

Dobrodošlica

Nakon triju brojeva prvog godišta *Lingvazina* vrijeme je za novi broj. Prvi broj drugog godišta nastaje u okolnostima koje su za *Lingvazin* u nečemu lakše, a u nečemu teže nego što su bile ranije. Lakše su jer *Lingvazin* više nije tek osnovani magazin pred kojim je neizvjesna budućnost i koji se tek treba dokazivati i stjecati publiku. A teže su jer novi *Lingvazin* treba slijediti visoke standarde koji su postignuti u ranijim brojevima.

Ovaj broj *Lingvazina* posvećen je bosanskohercegovačkom lingvistu Muhamedu Šatoru. U julu 2014. godine navršeno je deset godina od njegove smrti i prvi tekst govori o njemu. To je ovaj put jedini tekst u rubrici *S povodom*.

Saradnja s inozemnim lingvistima i dalje ostaje jedna od glavnih zadaća i odlika *Lingvazina*. U ovom broju za *Lingvazin* govori Peter Trudgill, jedan od najistaknutijih svjetskih lingvista, najviše poznat po doprinosima sociolingvistici i dijalektologiji.

Za *Lingvazin* piše i Anna Luisa Daigneault, referent za razvoj i koordinator latino-američkih projekata u Institutu za ugrožene jezike *Living Tongues*. Njezin tekst donosi dosta zanimljivih podataka o ugroženim jezicima i o onome što se može i treba učiniti da se spriječi njihovo izumiranje.

U posebnim radovima govori se o policentričnim jezicima, *lingvističkom otisku* autora, jezičko-stilskim osobnostima *žute*

štampe, nekim figurativnim predstavama bosanskohercegovačke lingvističke situacije, terenskom istraživanju usmene književnosti u Bosni i Hercegovini i kratkim pričama Alice Munro, dobitnice Nobelove nagrade za književnost 2013. godine.

U prvoj polovici 2014. godine bilo je više događaja značajnih za jezik i književnost a ostvarena je i značajna lingvistička i književna produkcija. *Lingvazin* je bio medijski pokrovitelj jednog od tih događaja – Sarajevskih filoloških susreta 3, o kojima izvještavamo u ovom broju. Također predstavljamo nove knjige i časopise te donosimo više vijesti o jeziku i književnosti.

Jedna od značajnijih novosti iz Instituta za bosanski jezik i književnost u Tuzli jeste da je objavljen prvi broj naučnog časopisa *Bosnistika plus*, koji je, uz *Lingvazin*, jedan od najznačajnijih projekata Instituta.

U ovom broju polahko počinjemo i pripreme za 26. septembar – Evropski dan jezika. Zato na posljednjoj strani donosimo poster s osnovnim podacima o tom danu. Poster je namijenjen prvenstveno najmlađima. Pogodan je za prezentaciju u učionici, ali i za širenje putem društvenih mreža.

Na kraju nam, kao i uvijek, ostaje da poželimo da čitanje *Lingvazina* bude ugodno i korisno svima do kojih on dopre te da svi oni koji ga budu čitali shvate njegovu pojavu i kao poziv za saradnju.

Halid Bulić